

Sah solat tirai ditutup

Soaljawab agama



Bersama DR. MOHAMMAD NIDZAM ABDUL KADIR AL-JARUMI

Pensyarah di Fakulti Ekologi Manusia, Universiti Putra Malaysia dan pendakwah bebas. Kemusykilan boleh diajukan ke nidium@yahoo.com

A DAKAH sah solat jemaah wanita yang tidak membuka kain tirai menutupi kawasan solat mereka?

PADA asalnya, tiada tirai. Ini berlaku pada zaman Nabi SAW iaitu para sahabat wanita bersolat di belakang jemaah saf sahabat lelaki. Namun, perubahan zaman membawa kepada perubahan suasana iaitu bahagian wanita ditutup dengan tirai atau langsir.

Ini adalah baik kerana adat kebiasaan wanita menggunakan kain teleung untuk bersolat. Mereka akan membuka tudung kepala untuk memakai kain teleung. Begitu juga wanita dapat berehat seketika dalam ruang kawasan jemaah wanita tanpa berasa segan dan malu kepada jemaah lelaki kerana pandangan lelaki terhalang dengan adanya tirai.

Dalam solat berjemaah, seeloknya dibuka sedikit

atau kain tirai daripada kain yang tidak tebal. Ia bertujuan membolehkan makmum wanita dapat mengetahui pergerakan imam dengan melihat jemaah lelaki di hadapan kerana tirai sedikit terbuka atau agak nipis.

Antara syarat penting dalam solat berjemaah ialah makmum mengetahui pergerakan imam:

- Pengetahuan ini diperoleh dengan melihat pergerakan imam atau pergerakan makmum lain.

- Mendengar suara imam atau suara bilal yang menguatkan suaranya.

- Jemaah wanita juga dapat mendengar suara imam melalui pembesar suara. Maka seeloknya dibuka sedikit.

Sama ada sah atau tidak jika tirai ditutup tanpa dibuka sedikit, terdapat pandangan menyatakan bahawa solat berjemaah sebegitu tidak sah.

Namun begitu, ia bukanlah satu kesepakatan para ulama.



Harus matikan kucing berpenyakit

A PA hukum mematikan kucing yang mempunyai penyakit kronik dan berjangkit. Doktor haiwan mencadangkan demikian kerana bimbang bakal memudaraskan kucing lain.

PEMBUNUHAN haiwan tanpa hak ditegah dalam Islam. Dalam riwayat hadis, Rasulullah SAW menjelaskan bahawa insan akan ditanya di akhirat nanti jika dia membunuh burung dan seumpamanya. Namun jika ada hak maka tidak mengapa.

Kemudian Nabi menjelaskan bahawa haknya ialah sembelihan untuk dimakan.

Maksudnya jika membunuh haiwan dengan kaedah sembelihan syarak dengan tujuan makanan maka ia diharuskan.

Berdasarkan riwayat hadis ini, nampaknya tidak harus dimatikan kucing. Namun begitu, jika wujud mudarat maka ia bertukar menjadi harus.

Dalam hal ini, penyakit yang disebutkan adalah penyakit berjangkit. Kos rawatan juga



mungkin mahal sedangkan tiada lagi harapan sembuh menurut ilmu perubatan haiwan. Maka berdasarkan mudarat yang ada, hukumnya adalah harus.



Syurga atau neraka?

B AGAIMANA kedudukan anak kecil yang mati ketika kecil sedangkan ibu bapanya tidak beriman? Anak ini masuk syurga atau neraka? Saya mendengar pendapat bahawa anak ini akan dimasukkan ke dalam neraka kerana mengikut agama ibu bapanya. Benarkah begitu?

ULAMA berbeza pendapat tentang isu anak kecil ini. Anak kecil ini maksudnya anak yang belum baligh. Jika mati sebelum usia baligh, terdapat

beberapa pendapat, antaranya, anak kecil ini akan masuk syurga, menjadi khadam dalam syurga, akan terlebih dahulu diuji di akhirat nanti dan jika lulus akan masuk syurga serta akan masuk neraka kerana mengikut agama ibu bapanya.

Hakikatnya, tiada siapapun yang mengetahui kedudukan sebenar. Kita hanya sekadar menghikayatkan pandangan para ulama sahaja.

Oleh itu, kita tidak perlu bersusah-payah mencari jawapan sebenar kerana ia tidak diketahui oleh manusia.

Pakaian terkena percikan najis

S AYA menunggang motosikal kemudian terlanggar najis mughallazah. Dalam perjalanan seterusnya, tayar itu melalui jalan bertakung dengan air tanah. Adakah seluar perlu dibasuh lagi?

PERTAMA, perlu dipastikan sama ada itu najis mughallazah atau tidak. Jika benar, ia perlu dicuci mengikut kaedah penyucian najis mughallazah. Jika tayar motosikal, kereta dan seumpamanya maka tidak perlu dicuci mengikut kaedah najis mughallazah.

Tayar motosikal dan kereta tidak digunakan ketika solat.

Jika pakaian terkena najis mughallazah maka pakaian perlu dicuci mengikut kaedah najis mughallazah, kerana pakaian dipakai ketika solat.

Percikan air bertakung tidaklah menyucikan seluar yang terkena najis mughallazah. Air bertakung itu sekadar air tanah sahaja. Ia belum lagi disiram dan dibasuh dengan air mutlak. Maka seluar tetap perlu dibasuh lagi.